

معاناة الأهالي في يونيو 2020



زوجة المعتقل طبيب وليد شوقي

من شهر 10 وأنا مش في مكان شغل ثابت، كلها حاجات مؤقتة وشوية وأدور على حاجة تانية مع الـ freelancer علشان جوزي وحش وفي قضية سياسية وشريير وكده، ولو كان الشغل بالنسبة لي مش حاجة أساسية في الدخل وقت وجود وليد فهو الأساس دلوقتي، الحمد لله طبعا على كل حاجة، بس نفسي شوية الناس اللي في إيدها القرار تفكر بعقل شوية، مش بنقول إنسانية بس شوية عقل، شوية عقل لحد ما أنا واللي زيي نفهم بس احنا بندفع تمن إيه؟!

<http://tiny.cc/4uu8pz>



ماذا بينك وبين الله يا عمر:

عمر كان طالع الثاني على مدرسته في ثانوي دخل هندسه معماري وكان رسام اوتوكاد في مصنع ومتميز في شغله رغم صغر سنه.. بعد ما خلص سنه تانية وكان عمره 20 سنه صحاه ابوه من النوم يوم استشهاده وقاله قوم يا عمر خليك جنب ماما وخلي بالك منها وفقد عمر ابوه اللي كان له اب



واخ وصديق وقعد يدور على جثمانه وسط الجثث يومين لحد ما لاقاه وخده ونزل معاه القبر ودفنه ورجع اتفق معايا انه هيكون جنبي ونربي سوا اخواته البنات وسنهم كان 11 و13 سنه. ودخل عمر سنه ثالثه كان بيقلولي مش قادر ادخل الامتحان كل ما أفتح الكتاب بشوف صورة بابا والمشرحة، مش قادر. قولتله حاول عشان خاطري انا. ووعدني انه هيدخل الامتحان وهينجح. وفي يوم وهو نازل الصبح رايح شغله الميكروباص اللي كان راكبه عمل حادثه وعمر كان وشه زي الكتاب المفتوح بوصف الدكتور. دخل عمليات 4 ساعات بيحاول الدكتور بس يجمع له وشه على بعضه. الممرضة بتقولولي العملية كانت كبيره وصعبه وهو ماكانش بيقلول غير الحمد لله لحد ما فاق من البنج وماقالش اه ابداء. انا عمري ماشوفت كده..

وكان المفروض يعمل عملية تجميل قال يخلص امتحان الاول ويحجز العملية وقبل اخر امتحان بيوم قال لي هيتعشى برا مع زميله احتفالا بانه باقي ماده واحده وكمان قبل ما يعمل العمليه.. وهو خارج من المطعم لقي ميكروباص واقف خدوه هو وكل اللي معاه. وصحيت من نومي ساعتها على صوتي وانا بصرخ واقول يا عمر. قلبي حس بيه قبل ما اعرف أي حاجه.

اختفي 16 يوم ما اعرفش عنه حاجه. كنت بموت فيهم حرفيا لحد ما جالي خبر اعتقاله وبعد شهر من غيابه شوفته وكانت صدمه كبيره لما شوفته. شكله متبهدل وايده مايقدرش يمسك بيها حاجه وتكاد

تكون واقفه وقال لي ماتلقيش يا ماما كلهم بيقولولي انت خارج بعد ما اتاكودو إني ماليش في اي حاجه وقال لي ماتزعلدش انا اول ما اختفيت شوفت آية (واصبر لحكم ربك فإنك بأعيننا) قال لي الآية دي صبرتي على كل اللي شوفته.

ولكن جت الصدمة الأكبر انه خد حكم وما خرجش واتبدلت احوالنا ووقفت بينا الحياة عند هذه النقطة وانا واخواته محور حياتنا بقي يدور حولين السجن والزيارة وبس.

كبروا اخواته عمر كبير فوق عمرهم وعمر برده كبر عمر كبير فوق عمره وانا بتفرج عليهم وعاجزه عن إني اعملهم حاجه.. النهارده عمر كامل خمس سنين في السجن.. خمس سنين ضاعوا من عمره ظلم وضاعوا مننا برضه والله ما عاهدته في كل الاحداث اللي مرت عليه دي متلاحقة ورا بعضها وفي سنه الصغير ده الا صابر ومحتسب.. دي قصة عمر قصه من آلاف القصص اللي زي عمر.. بقي لي 3شهور ما شفتوش يا رب طمن قلبي عليه يارب.. يارب احفظهم جميعا وهونها علينا وعليهم وارزقنا فرحة خروجهم قريبا وارزقنا الصبر والثبات والرضا.

<http://tiny.cc/fzu8pz>

شقيق المعتقل زياد العليمي المحامي

اكثر حاجه شغلاني لما يفتحوا الزيارة يارب هلحق احكي لزياد اللي حصل فترة الغلق ولا مش هعرف وهنقعد نتخانق انا وماما ونديم على مين اللي هيتكلم الاول واللي ياخذ النصيب الاكبر من ٣٠ دقيقة كل اسبوعين بعد معاناة الانتظار قدام السجن وحجز معاد الزيارة وتجهيز ماما الاكل قبلها بيوم والخناق معايا عشان ألحق معاد حجز الزيارة لحسن ماتلحقش. والواد ما يعرفش يشوف ابنه وألحق على آخر لحظه قبل ما يقفلوا الكشف ونديم يوصل بردوا بعد ما ماما تقعد تتصل بيه عشان يلحق فبردوا يوصل في آخر لحظه قبل ما ندخل. طبعا بعد المجهود ده بيكون كل واحد مننا عايز ياخذ ال ٣٠ دقيقة ليه لوحده اللي اساسا بتتصفص على ٢٠ دقيقة بيخلصوا في جدل وطبعا توصيل ماما لسلامات الناس وبيقولوا عنه ايه وبيكتبوا ايه وشعر ايه، وبعد ما تاخذ غياب وحضور تكون الحصه خلصت ومحدث لحق يقول حاجه ولا هو قال لي حاجه ولا انا ولا ابنه قال له حاجه ولا هو ولا ماما قالت له حاجه ولا هو. شوية سلامات على شوية احضان ومين فاكرك ومين ناسيك ودمتم وطبعا مش هاخذ البنات عشان مزودش خناقات. اه صحيح نسيت اقولكم ان حقنا القانوني ساعة وطبعا من غير ما يكون راكب فوق دماغنا وقاعد في حجرنا شخص كل شوية يقولنا علي صوتك عشان يسمع وعمال يكتب اي هرس حتى و نديم بيكلم ابوه على بعض من الاحداث اللي متخيل انها حتحسس ابوه انهم مع بعض



<http://tiny.cc/x2u8pz>

أبناء الصحفي محمود حسين

بابا في سجن طرة تحقيق، وكان منتشر من أيام خبر ما نعرفش مدي صحته عن وفاة أحد العاملين في السجن ده نتيجة إصابته بالكورونا، بيان وزارة الداخلية مكاشش كافي وما قدمش ورق فيه سبب وفاة الراجل ولا طمننا على بابا وفي كل الأحوال سلامة بابا مسؤولية وزارة الداخلية وقطاع السجون ووزارة العدل والنيابة ووزارة الصحة، لو بابا لا قدر الله حصله حاجة يبقي ده نتاج تعنت مش مفهوم في حق (صحفي+ عنده ٥٣ سنة+ محبوس



احتياطي بدون إثبات تهمة+ أخذ أمر بإخلاء سبيل لم يُنفذ+ دراعه مكسور+ ليس له سجل جنائي سابق يقول ان خروجه في خطورة+ معلوم محل إقامته وجهة عمله+ والده توفي أثناء حبسه)
في ظل وجود وباء وصل لذروته ولا يسمح باستهتار أو تهاون.. حياة بابا مش لعبة، وهو مش مجرم عشان يتحبس ٣ سنين ونص كده بدون تقرير مصير.. وإحنا مش عاوزين غير إنه يرجع لنا بالسلامة وياخدنا ف حضنه ونقفل علينا بابنا لحد ما ربنا ينجينا من الوباء.

ليه ده شيء صعب يا بلدي؟

<http://tiny.cc/myx8pz>

نجلة المعتقل محمد سعد

"والدي أستاذ محمد سعد محمد السيد، حاليا في سجن العقرب شديد ٢، من وقت ظهوره بعد إخفاء قسري.. والدي معتقل من يوم ١٠ يوليو ٢٠١٩ وظل مختفي قرابة العشر أشهر.. فيه حالات ظهرت في السجن كورونا، ووالدي عنده ضعف مناعة ساعدونا أن والدي واللي زيه يخرجوهم قبل ما الكورونا تنتشر جوه الكل يتصاب وما نعرفش نلحقهم!"

<http://tiny.cc/l0x8pz>



والدة الزهراء عزة توفيق

اللهم اجرنا في مصيبتنا واخلفنا خيرا منها
اللهم اربط على قلب أصغر ابنائي الحسن خيرت. اخذ اخلاء سبيل أمس في
قضية واهية واليوم وضعوه في قضية أخرى. ماذا تريدون منا؟ اللهم دبر له
امره واربط على قلبه. اللهم انتقم ممن هم سبب في ظلمنا. انت القادر الجبار

<http://tiny.cc/ezidqz>



ميسون المصري عن ماهينور المصري

أنا عارفة ان بقي لي فترة كبيرة ما بكتبش حاجة عن ماهي وعارفة ان صحابها
وحبايبها قلقانين وبتبقوا عايزين تطمنا.
أنا بطمنكم على ماهي هي بخير والحمد لله واحتياجاتها الأساسية بتدخلها
كلها الحمد لله.. ومن وقت للتاني بتخرج لنا جواب تطمنا عليها وعلى أحوالها
واخرهم جواب خرج لي لما زورت النهارده.

طبعاً هي شغلها الشاغل قلقها الشديد على كل الناس بره وبتسأل على واحد
واحد من صحابها جوه مصر وبره مصر. هو وقت صعب ومربك على الجميع وانقطاع الزيارات مخلي
القلق رايح جاي بينا وبينها، بس الحمد لله ان فيه وسيلة نقدر نطمن بيها على بعض. والحقيقة ان
ماهي دائماً عندها القدرة انها تمتص كل اللحظات الصعبة وتتعامل معاها بهدوء وخفة.

<http://tiny.cc/skjdzqz>



عن أحمد رؤوف

من يوم ٣-٧ قطعت كورونا عنا الزيارات لأحبائنا ويوم ٢-٦ نزلوا المحاكم ولم
نري احد بس سمعنا اصواتهم فقط واطمنا انهم بألف خير وكانوا جميعاً كما
اخبرنا المحامي انهم كانوا يرتدون الكمامات. لا اعرف لماذا السياسيين بالذات
يمنعوا رؤيتهم ولا حتى نري ظلمهم. لكن الحق يقال كلهم كانوا من العربات
يطمنونا عليهم ويؤكدون انهم ثابتون
ربنا يقويكم يا ابطال

<http://tiny.cc/6rjdzqz>



والدة سولافه مجدي

قالت تغريد زهران، والدة المصورة الصحفية المعتقلة سولافه مجدي، إنها تقدمت بشكوى للنائب العام، للمرة الخامسة، بخصوص عدم السماح لها باستلام رسالة من ابنتها.

وقالت الأم "للمرة الخامسة، بعثنا شكوى للنائب العام بخصوص اللي بيحصل معانا، ذهبنا أمس لتوصيل الأمانات لسولافه وكالعادة مفيش رسالة منها، على الرغم من خروج رسائل من معتقلين آخرين."

"بقا لي 3 شهور ماعرفش حاجة عن بنتي وماعرفش إذا كانت الحاجات اللي بوصلها بتدخل لها أصلاً أو لاء، ومش عارفة أروح لمين تاني عشان يساعدنا."



<https://bit.ly/2XBiTHT>

منى سيف

فيه أخبار متواترة عن ظهور حالات كورونا في طرة تحقيق سجن طرة تحقيق ده اللي فيه موظف اسمه سيد حجازي توفي من الكورونا -ربنا يرحمه ويصبر أهله- وطبعا الداخلية ما أعلنتش وقتها لكن الخبر اتنشر فاضطروا يعلقوا عليه.

ده وضع السجناء في كل سجون مصر: تعتيم من بعد منع الزيارات في مارس اللي فات، اصرار على استمرار حبس الاف مفيش أي ضرورة لحبسهم، الاصرار على التعامل مع أزمة كورونا بعقلية أمنية بليدة وكارهة للعلم مش بعقلية مدركة حجم المشكلة وتابعاتها الصحية والاجتماعية والانسانية.. وأثرها الممتد على مستقبل كل حد مننا أيا كان مين.

دي مش أول مرة يطلع أخبار تسبب الهلع عن انتشار كورونا في سجون مصر، ويبقى الأهالي قاعدين مش عارفين دي معلومة ولا اشاعة.. بس دي أول مرة الأخبار تبقي فيها تفاصيل محددة وكمان بادية في سجن احنا عارفين وموثق والداخلية ارغمت تطلع بيان: ان فيه موظف توفي وتحليل كورونا كان ايجابي المساجين في خطر حقيقي

الكابوس اللي بنحاول نلفت انتباه كل مسؤول له بقالنا شهور بقي خلاص جزء من واقعنا. لا رئيس الوزراء ولا وزيرة الصحة مهتمين بالسجون. ولا النائب العام بيقوم بدوره ويحقق في البلاغات والاستغاثات المتراكمة. ولا القضاة بيخلوا سبيل المئات اللي بيتعرضوا عليهم "عالورق بس" في مخالفة صريحة للقانون.

ولا القائمين على ادارة السجون فارق معاهم ولسه بيتعتنوا في دخول مستلزمات صحية ونظافة أساسية لمواجهة الكورونا في أي مكان



الجهاز الوحيد المهتم بالسجون هو أمن الدولة/الداخلية ومش مهتم بظروف وأوضاع الناس اللي فيها ولا بتطبيق القانون، مهتم فقط بشحن أكبر عدد ممكن من المواطنين وايداعهم فيها-مش مهم يفضلوا عايشين ولا لأ. المهم السجون تتملي. مهتم بإحكام قبضته ومنع أي أخبار أو معلومات من الخروج منها، وبتوسيع مساحة الانتهاكات المتكررة لحد ما تبقي "عادية" و"مقبولة" عشان يبقي عنده مساحة بيتكر وسائل جديدة للتنكيل والتكدير.

محتاجين نضمن على اللي في السجون. محتاجين تواصل مباشر يفهمنا هم عاملين إيه. محتاجين دخول ادوات النظافة والتعقيم والأدوية والفيتامينات بدون أي تعنت حالا. محتاجين خروج أكبر عدد ممكن من المساجين، والأولوية لكبار السن والناس اللي عندهم تاريخ مرضي أو صحتهم هشة. كفاية جليطة وقسوة وجهل

رابط خبر مدي مصر عن وفاة موظف في سجن طرة تحقيق

<https://www.facebook.com/freealaa2013/posts/3302245573160397>

رابط بيان الداخلية عن وفاته

<https://www.almasyalyoum.com/news/details/1982089>

<http://tiny.cc/uefgqz>

سنا سيف

من اسبوع فيه موظف في سجن طرة تحقيق اسمه سيد حجازي مات من كورونا، وكالعادة تفاصيل وفاته تقهر. بنته كانت بتستغيث على الفيسبوك عشان حد يساعدها تستلم نتيجة المسحة (النتيجة ضرورية حتى لو الأعراض باينه زي الشمس لأن مستشفيات عزل الحكومة مش بتقبل حالات بدون نتيجة مسحة إيجابية او واسطة). وانه مات بعد ما عمل المسحة ب ٦ ايام لكن النتيجة مكنتش لسا طلعت.



بعد الخبر دا ناس كثير حذرت من كارثة هتحصل في السجن لأن حد زي عم سيد غير اختلاطه بزمايله في الشغل العادي لكن شغلانته فيها احتكاك مع كم كبير من الناس: هو بياخد فلوس من الأهالي على البوابة وبعدين يدخل السجن يسلم المساجين بونات مقابل الفلوس دي. كان لازم بعد وفاته يتعمل مسحات لكل العاملين والمساجين في طرة تحقيق عشان نتفادي كارثة، لكن طبعا ولا الهوا.

النهارده في اخبار ان في ٨ حالات إيجابي كورونا في سجن طرة تحقيق. وان إدارة السجن اخلت عنبر للعزل. لكن مش موفرين للعانيين اي رعاية بالتالي باقي المساجين الاطباء هما اللي بيحاولوا يوفروا رعاية للمرضي وقت التريض/الفسحة، ومش بيعملوا مسحات لكل الناس اللي بتعاني من اعراض فغالبا العدوي دلوقتي قاعدة بنتنشر وطبعا مش موفرين اي سبل حماية وزي اي سجن مضيقين جدا على الأهالي لما بيحاولوا يدخلوا لولادهم مطهرات وماسكات. يعني لا بيرحموا ولا سايبين رحمة ربنا تنزل.

لو متخيلين ان المصيبة اللي بتحصل في السجون دلوقتي دي بعيدة عنكو وان مش وقت تفكير في المعتقلين دلوقتي، الحقيقة لا خالص. حاولوا تتخيلو كم الناس اللي داخله خارجة على مبني سجن واحد، من ضباط، موظفين، مساجين واهالهم ومتوزعين على مساحات ديقة جدا فالتباعد الإجتماعي دا ممكن نبه ونشرب ميتة. غير ان في منهم بيخرج من السجن يركب مواصلات ويختلط بناس تانية في بيته وهكذا.

اخر حاجة، سجن طرة تحقيق دا اللي مات فيه شادي حبش يعني الطقم الطبي اللي معرفش يلحق حالة تسمم عادية جدا مش محتاجة اي إعجاز طبي ومش بس سابوه يموت موت بطيء على مدار يومين كمان ادوله مضاد قىء يعني حتى مسابوش جسمه يقاوم التسمم. المفروض دلوقتي نفس الدكاترة دول هما اللي يتعاملوا مع حالات كورونا.

وإدارة السجن اللي مات في ايديها ٢ مساجين في كل مرة كان في فرصة يتلحقوا لو الاستجابة كانت أسرع المفروض نثق انهم هيقدرنا يسيطروا على انتشار الوباء.

<http://tiny.cc/fhfgaz>

نعمة هشام زوجة محمد باقر المحامي

فات ٨ شهور على حبس محمد.. و٣ شهور على آخر مرة شففته فيها.. كل الكلام بقي ماسخ ومعاد ومكرر.. كل الكلام ما يقدرش يوصف حجم الألم والخواء الداخلي.. نفسي بس اشوف وشه والمسه واسمع ضحكته من تاني.. حالة من العبثية بدون أفق ولا وضوح لأي نهاية.. جلسات مجلس مشورة بدون محمد.. وبدون إخلاء سبيل.. لحد



امتي؟! <http://tiny.cc/grfgaz>

عن والدة المعتقل حسن مصطفى (رحمها الله)

كلمتين في صدري من امبارح وفي نهايتهم عدد من الأسئلة، مجرد أسئلة افتراضية مش حقيقية إلا إني حقولها عشان أمنع مخي من الانفجار.. ليس إلا

طنط أميرة والدة صديقنا حسن فقدت وعيها داخل عربية المترو في محطة حمامات القبة في لحظة بين الساعة 1 ونص الظهر والساعة 2 بعد محاولتها لإدخال محتويات زيارة لحسن واللطعة بالساعات تحت الشمس في يوم



كانت درجة حرارته تكاد تكون 40°

عرفت الخبر الساعة 2:35 بالضبط واتحركت في ساعتها من مكاني ووصلت الساعة 3:30

حصل متابعة مع الشخص اللي لحقها وخرجها بره المترو وطلب لها الإسعاف اللي وصلت بعد مايقرب من ساعة ونص وراحت بيها على مستشفى الدمرداش بعد ماكانت رايحة على مستشفى الزيتون بين الساعة 3 و 3:15 بعد ملاحظة درجة حرارتها واشتباه المسعف انها حالة كورونا ووراها كان في صديق للأسرة بعربيته.

استقبال مستشفى الدمرداش كان زحمة والجو كان حار على ان حالة فاقدة للوعي وحرارتها عالية وبتعرق بغزارة تكمل فيه دقيقة زيادة.. وزحمة على ان فرصتها في التقاط عدوي تخليها تقعد دقيقة زيادة برضه.. والمخاطرة بتركها والجري في المبني بحثاً عن دكتور خلي استمرارها لحظة واحدة في المستشفى مخاطرة كبيرة، وخذناها برة المستشفى لجوه عربية الصديق.. على الأقل العربية فيها تكييف جاز يساعدها تفوق في حال لو عندها إجهاد حراري أو ضربة شمس، وكربي ممكن يرجع لورا وتبقي شبه مستلقية.. والحال في حميات العباسية كان نفس الشيء.

في الوقت ده وأثناء اللف عالمستشفيات 'من الدمرداش لحميات العباسية للمستشفى الإيطالي للقاهرة الفاطمية رجوعاً للمستشفى الإيطالي ثاني' من الساعة 3 ونص لحد الساعة 5 العصر - قبل انتهاء بطارية تليفوني - كنت في مكالمات متصلة مع أطباء وأصدقاء في محاولات لفهم حالتها قبل ما أعرف نروح بيها فين، لعلمي المسبق ان المستشفيات بؤر عدوي وفكرت أجرب صيدلية.. كل اللي اتصلت بيهم مشكورين جدا نصحوا باللي يقدروا عليه في إطار معرفتهم باللي ذكرته لهم عن أعراضها أثناء محاولاتنا مع المستشفيات والصيديات والنصايح تركزت في ضرورة قياس ضغطها وكمادات باردة وخافض للحرارة مع مراعاة إخطار الطبيب أو الممرض بأي حالة مرضية عانت أو بتعاني منها، ماكنتش مهتم بأي تشخيص للكورونا أد ماكنت مقتنع انها حالة إجهاد حراري، واضح انها كانت خطة واقتراحات طموحة زيادة عن اللزوم.. انتهت بوفاتها في العربية أثناء محاولتي التفاوض داخل صيدلية على ان حد فيهم يطلع يديها حقنة خافض للحرارة ويركب لها محلول بعد قياس ضغطها في وقت بين الساعة 5 ونص والساعة 6 أسئلتى بقا المعركة في الذاتية

مين اللي بيقرر ان الحالة الفلانية - أغلب الحالات - يتم لفظها وتحويلها على أي مكان ثاني بدون إلقاء أي نظرة مدققة على الحالة؟ أمن المستشفى؟ إدارة المستشفى؟ أمن الدولة؟ ماهو محدش يقول لي وزارة الصحة لأنها ضيف شرف في الفيلم ده كله هل حد أساساً اهتم يتكلم معايا؟ بلاش يبص عليها.. مجرد يقول لي الأعراض دي احتمالاتها كذا أو كذا، وانتوا حتقدروا تعملوا بنفسكوا من غيرنا كذا واحنا كنا حنقدر نعمل كذا بس للأسف مش حنقدر نعمل كذا عشان الإمكانيات؟ ماحصلش

هل لو كنت احتجزت حد من الطقم الطبي في الدمرداش أو عين شمس أو حميات العباسية بسلاح أبيض عشان مجرد ألاقى دكتور ييجي يتكلم معايا يديني أي فكرة كانت والدة حسن حتبقي مازالت عايشة؟ ربنا يكون في عون الدكاترة وأطقم التمريض اللي بيमतوا كل يوم وسط سياسات دولة بتتعهد ترميهم للموت مع سبق الإصرار، وعارف تماماً ان ملف الكورونا في مصر هو مجموعة تعليمات صارمة مالهاش علاقة بالصحة العامة من أمن الدولة بالأساس، لا من وزارة الصحة ولا نقابة الأطباء، والدكاترة لو أتاحت لهم الفرصة فحيرصّدوا مهازل شافوها يومياً تخص حياتهم اللي على المحك كل يوم.. لكن في اللحظة نفسها

مطلوب أتصرف ازاي وأم صديق بتنازع الموت وكل دقيقة في مفاوضات سواء مع أمن المستشفيات أو التمريض أو الصيدليات بتفرق؟

هل لو كنت اقتحمت بوابة المستشفى الإيطالي بالعربية كان ممكن يكون في فرصة يتعاملوا معاها باعتبارها حالة ضربة شمس أو إجهاد حراري محتاجة مجرد خافض للحرارة وكماادات باردة وشوية محاليل؟

والصيدليات اللي لفينا عليها؟ هل كان مفروض أخش أفتش جوه كل صيدلية أتأكد بنفسي إذا فيها جهاز قياس ضغط من عدمه؟

أنا مش بتكلم عن سرير عناية مركزة، ولا جهاز تنفس صناعي، ولا عينة PCR، ولا أسطوانة أكسجين .. ماكناش محتاجين أي حاجة من دي وأكدت في كل مكان روحته "أربع مستشفيات وصيدليتين" على ان ده مش طلي .. انا بتكلم في حقنة خافض للحرارة - كماادات باردة - محلول سواء ملحي أو جلوكوز بحسب ضغطها اللي ماعرفناش حتى نقيسه لأن حتى جهاز قياس الضغط مكانش متاح! تطلبه في الصيدلية يقولك المستشفيات سحبتة، تروح المستشفيات مايرضوش يستقبلوك أصلاً

طيب هل حتى نجحت في إني أقنع أي حد في مستشفى القاهرة الفاطمية - حتى بعد ما نبضها ونفسها وقفوا - إن حد فيهم ييجي يفحصها وهي ميتة في العربية عشان نعرف هي لسه عايشة ولا ميتة؟ برضه ماحصلش لأن باب المستشفى كان مقفول بجنزير.. يمكن لو كنا اقتحمناه بالعربية كان ممكن؟

طيب الدكتور اللي في المستشفى الإيطالي اللي طلعلنا عشان يتأكد من وفاتها، ماعرفناش نشوفه ليه قبلها بساعة لما كانت لسه عايشة وماحدث رضي يدخلنا؟ طيب ماطلعش هو ليه؟ وهل أصلاً قبل كل ده لو مكانش البهوات ضباط أمن الدولة اعتقلوا حسن أصلاً كنا حنبي في الموقف ده؟

على الله بس يكون أعلى ساري علم لمصر وأكبر مدينة ملاهي وأكبر ملعب جولف في العاصمة الطفيلية الجديدة بتاعتك يكونوا بخير.. إلحق استمتع بيهم

<http://tiny.cc/lfwiaz>

والدة المعتقل زياد العليمي المحامي

الزيارة ممنوعة عن السجناء من يوم ١٠ مارس!! لغاية النهارده الأهالي لا شافوا اولادهم ولا سمعوا صوتهم!! يطمنوا عليهم ازاي؟ والمسجونين دول نوعين؟

١ (المسجون احتياطيا، وده لسه تحت التحقيق يعني لم تثبت عليه تهمة!! يتعاقب ليه عقوبة إضافية هو واهله بمنعه من



الاتصال بهم ومنعهم من معرفة أخباره او احتياجاته عشان يدبروها؟

١ (المحكوم عليه وبيقضي عقوبة السجن (حتى لو كان ارهابي وقتال قتلي).. بيقضي عقوبة!! يبقى مش من حنكم اضافة عقوبة أخرى عليه ومعاقبة اهله كمان بمنعهم من الاتصال به!!

#فيه_وباء_خرجوا_السجناء_وخذوا_كافة_الاحتياطات_اللازمة_لضمان_خضوعهم_للمحاكمة_وقت_ما_تعوزوا_او_فرض_إقامة_جبرية_على_المحكوم_عليه_طوال_فترة_محكوميته_أو،_وهذا_أضعف_الإيمان،_اسمحو_لهم_بالاتصال_التليفوني_مع_أهاليهم!!_الجوابات_لا_تكفي_لمعرفة_أحوالهم_واحتياجاتهم

#من_حقنا_نظمن_على_أولادنا

#من_حقنا_نسمع_صوتهم

كفاية_افترا_وعقاب_للأهالي،_ربنا_ينتقم_منكم_ومن_مطبلاتينكم

<http://tiny.cc/zxelqz>

الأستاذة إكرام يوسف

قريت ان والدة حسن مصطفى -ربنا يرحمها ويسند قلب ابنها وينتقم من الظالمين- تعبت ووقعت في المترو بسبب وقفها بالساعات في الشمس قدام باب السجن، بعد مشوار سفر من اسكندرية!!

عشان الناس اللي ماتعرفش، السجن بتفتح باب تسجيل الزيارة من الساعة سبعة لعشرة الصبح، عشان الأهل يسجلوا اسمهم، واغلب الناس بتسجل اسمها بدري، عشان ممكن بيحوا قبل ميعاد انتهاء التسجيل ويقولوا اكتفينا

زيارات النهارده!! وناس كتير بتبقي جاية من محافظات بعيدة عن القاهرة!! بيسجلوا ويقعدوا مستنيين في الشمس احيانا اربع ساعات او خمسة على ما يبجي دورهم ويا دوب يسلموا فلوس او دوا او وجبة، من غير ما يشوفوا اولادهم، وبيحسبوها عليهم زيارة!!.. تخيلوا يا مطبلاتية لما تتحرموا من شوفة عيالكم او سماع صوتهم بالشهور، وما تبقوش عارفين حتى اللي بتودوه بيوصلهم ولا لاء؟ بالإضافة إلى إنك ما تعرفش أحوالهم ايه جوه، وسط ظروف نضافة مزرية وأحوال صحية ما تسرش عدو ولا حبيب!! تخيل بقي كمان أهالي المختفين اللي ما يعرفوش عنهم اصلا حاجة بالسنين!!

اللهم عجل بعدلك وانتقامك من الظالمين

ربنا يرحم والدة حسن مصطفى ويسند قلبه ويقويه، لغاية ما يفرح قلوبنا جميعا بزوال الغمة وفك الكرب

<http://tiny.cc/bbflqz>

فيديو| خالد نجل الصحفية سولافه مجدي إلى والدته

وقال خالد، ذو السبع سنوات، في رسالته المصورة التي نشرتها والدة الصحفية سولافه مجدي على موقع فيسبوك «ماما أنت عامله إيه؟ أنت كويسة؟ أنت وحشتيني قوي يا ماما.»

وأضاف: «بقالك كتير مش بتبعتي رسايل هو البريد باظ ولا إيه ولا انتو لسه مصلحتوش.. أصل أنا ليه كتير مستني تبعتولي رسايل». واستطرد:



«مفيش مشكلة لو مصلحتوش البريد ممكن تصلحو بكرة أو بعد بكرة مفيش مشكلة.. إن شاء الله تصلحوه بسرعة»، وأشار إلى أنه تعلم كيف يصبح مصارعا.

لكنه عاد وقال: «سيبك من موضوع المصارعة ده ده ممل قوي موضوع المصارعة.. فخلينا فالمواضيع الأهم؛ أنت أهم.. عامله إيه بس.. أخبارك إيه.. أنت وحشتيني قوي يا ماما، وإن شاء الله ترجعوا بالسلامة والكورونا تخلص ان شاء الله بسرعة». وأضاف: «لما تخلص الكورونا على طول وتجيب تليفون تاني وتبعتي على الفيسبوك»

ولم يغفل خالد ذو السبع سنوات في ختام رسالته المصورة إلى والدته أن يوجه لها ولوالده نصائح ليحافظا على أنفسهم في ظل تفشي فيروس كورونا المستجد، حيث قال: «عشان مي جيش فيروس تاني لما تنزلو على الشارع ولما تطلعوا برضو عقموا نفسكم عشان مي جيش فيروس جديد.»

<https://bit.ly/2MLAVYq>

والدة المعتقل زياد العليمي المحامي

كان المتعارف عليه في السجون ان ادخال الطعام من دون زيارة ممكن يكون يوميا ومن دون تسجيل ولا أيام محددة!! (ويسموها طبلية)!! اتمنت زيارة الرؤية بسبب كورونا من يوم ١٠ مارس، فما بقيناش نشوف اولادنا ولا نسمع صوتهم ولا نقدر ندخل لهم اكل، كان مسموح فقط بإدخال الأدوية والمطهرات والفلوس!!.. من شهر سمحوا بدخول وجبة!! بس ايه، تتحسب زيارة!! يعني مش تدخل وجبة في اي وقت زي زمان!! لأ.. المحبوس احتياطي كل اسبوع يدخل له وجبة والمحكوم عليه كل خمستاشر يوم (يعني اسبوعين ويوم)!!

طيب انا دلوقت اعرف ابني محتاج ايه ازاي؟ عايز أدوية ايه ولا اكل ايه؟ وحالته الصحية عاملة ايه، حتى الجوابات اللي يتطلع بطلوع الروح بيتدخلوا في محتواها ومش بيسيوا السجناء يكتبوا اللي عايزينه!! نطمئن على ولادنا ازاي؟

بعث شكوي للنائب العام ورئيس مصلحة السجون ومأمور ليمان طرة عشان يسمحوا بعودة الطبلية يوميا (وكل واحد يبعث حسب مقدرته، لان المساجين بياكلوا مع بعض).. وطلبت السماح لنا بحقنا المنصوص عليه في لوائح السجون بتلقي اتصالات تليفونية!! مش طالين منة ولا جميلة! طالين حقنا كما حددته قوانينكم!! طيب نشككي لمين تاني؟ مين في البلد دي منكم يراعي ضميره وينفذ القانون؟

<http://tiny.cc/9sqoqz>

زوجة المعتقل مصعب رجب

انهاردة قبل الفجر أمن الدولة كسروا علينا باب الشقة واحنا نايمين واعتقلوا مصعب جوزي .. وخذوه معاهم وراحوا اعتقلوا بابا من بيته هو كمان ولحد اللحظة دي احنا منعرفش هما فين! ..

والحقيقة إن في تفاصيل كثير صعبة متتحكيش مرت بيا أنا وسارة بنتي كانت في منتهي السوء علينا ومحتاجين سنين عشان نتعافي منها..

الحقيقة إن مصعب جوزي بقاله فترة طويلة بعيد عن أي حاجة وبعيد حتى عن مجرد التصريح برأيه بأي أحداث عبثية بتحصل في البلد وبيحاول يعيش بشوية سلام وسط مراته وبنته.. أبويا بقي راجل كبير عنده ستين سنة وصحته متدهورة جداً خصوصاً بعد ما قعد معتقل من 2013 لحد 2018 وخرج بيحاول يعيش في شوية أمان..

سارة الصغيرة نفسيتها تعبانة جداً وكل شوية تسأل على مصعب وعايزاه وكل شوية تسأل عنه وأنا صحياً وجسدياً تعبانة جداً وطاقتي نفذت كاملة..

ادعوا لبابا ولمصعب ربنا ينجيهم ويحفظهم احنا استودعناهم ربنا وهما إن شاء الله في معيته وهو الكريم


وادعوا لسارة بنتي ربنا يخفف عنها ويرجع لها باباها في أسرع وقت وما تتحرمش منه..

وادعولي ربنا يرزقني الرضا والصبر والتسليم ويشفيني ويخفف عني ويردلي بابا ومصعب قريب (ولا تَحْسَبَنَّ اللَّهَ غَافِلًا عَمَّا يَعْمَلُ الظَّالِمُونَ إِنَّمَا يُؤَخِّرُهُمْ لِيَوْمٍ تَشْخَصُ فِيهِ الْأَبْصَارُ)

<http://tiny.cc/70qqqz>

شقيقة الراحل شادي حبش (توفى في سجن طره نتيجة الإهمال الطبي)

بوست كان المفروض اكتبه من فاترة بس للأسف حالي ما كنتش تسمح اني اتكلم في حاجة زي دي ولسه مش قادرة بس اكتشفت اني لازم اعمل دا عشان الموضوع وصل لمرحلة صعبه و مستفزة.
الناس اللي بتسألني: هو كان عنده اكتئاب فعشان كدا عمل كدا في نفسه ؟



بعيداً عن ان فكرة سؤالي انا او امي عن اي تفاصيل دا شيء في منتهي عدم الاحساس بالنسبة لي لكن السؤال نفسه غريب جداً بصراحة هو ازاي حد شاف كل الظلم دا و ما يبقاش عنده اكتئاب!! ازاي حد اتسجن اكثر من سنتين وهو مش عارف هيخرج امتي ولا هيخرج اصلاً ولا لا ما يبقاش عنده اكتئاب!! انا ما بتكلمش عن شادي بس عشان انا متأكدة إن اي حد كان مع شادي جوا جاله اكتئاب و حتى اللي بيخرج اعتقد انه يفضل مكمل معاه بس بطريقة مختلفة، ورغم كل ده ف لأ شادي ما عملش حاجة في نفسه،

شادي ما انتحرش، و مش هتكلم عن اد ايه البني آدم ده قوي جداً و انه اد ايه وقع كثير اوي و وقف تاني على رجله اقوي و احسن من الاول، لكن هقول ان شادي كان عنده امل كبير اوي انه خلاص خارج ، شادي كان لسه بيحلم ، شادي كان لسه بيضحك و بيهزر و لسه صابر.

شادي كتب قبل كده ان "السجن مابيموتش بس الوحدة بتموت " بس لأ يا شادي للأسف السجن كمان بيموت، السجن بيموت عشان اللي فيه ما عندهمش رحمة كفاية تخليهم يلحقوا واحد بيموت قدامهم و بيتألم بقاله ساعات او انهم حتى يدوا علاج صح يساعد مش يموت يا حبيبي.

ملخص كلامي "شادي ما انتحرش، شادي إتساب تعبان و بيتألم و محدش ساعده و لما جم يساعده خد علاج غلط. شادي مات نتيجة اهمال طبي ونتيجة ظلم وقهر."

<http://tiny.cc/rkroqz>

زوجة المعتقل محمد الباقر المحامي

محمد الجميل دائماً وابدأ.. رغم كل الظروف.. دائماً احنا الأولوية.. في كل زيارات السجن أو الجوابات.. ما اشتكاش ولا مرة.. أو قال حتى إنه متضايق أو حزين.. دائماً أنا كويس وزى الفل.. دائماً أنا باكل أحسن أكل وبلعب رياضة وواخد بالي من صحي ونفسيتي كويسه.. والوقت بيعدي بسرعة وكله كويس وكله تمام.. حتى لو معظم الكلام كذب لكن هو هدفه دائماً يريح قلوبنا ويطمننا.. في عز اللي هو فيه.. دائماً احنا الأهم.. احنا الأولوية.. مفيش ذرة أنانية أو دلال مباح للمسجون.. يخليك تخجل أنك تحكي له حاجة تضايقه أو تشيله همك.. يخليك ممتن ليه انه يحاول ما يزودش وجع وألم على ألم فراقه..



<http://tiny.cc/sqxrqz>

ابنة المعتقلة هدى عبد المنعم المحامية

زمان لما كنت بشوف ماما بتستخدم حلة الضغط مكنتش بفهم اشمعي يعني؟! وحلة الضغط دي لزمته ايه ؟

لما بدأت ادخل المطبخ وبيقت بظبط وقت الطبخ عشان وقت شغلي ووقت الغدا وهعمل ايه امي واحاول اظبط الدنيا زي ما ماما كانت بتعمل اضطريت ادور على حلة الضغط اللي عندنا خصوصاً لما قرأت انها بتسوي الاكل اسرع وبتاخذ ربع الوقت تقريبا وده حسب الصنف اللي بيتعمل فيها



اكيد انا مش كاتبة البوست ده عشان حلة الضغط وفائدتها انما الفكرة في فكرة الضغط اللي بيحول اي حاجة من وقتها الطبيعي للربع حتى لو ده كان عُمر البني ادم نفسه. انا اتحطيت جوة حلة الضغط دي من حبة حلوين واللي حطني في الحلة دي كل حاجة حاولي واتنسيت جوة الحلة. الحلة دي ساعات ربنا

يعافينا بتوصل لمرحلة الانفجار وممكن تعمل كوارث حسب ما قرأت. حسيت وجه تشابه بيني وبين الحاجات اللي بتتخط جواها

احنا مبنقاش شايفين اللي جوة الحلة حصلت إيه. ولا عارفين نتيجة الضغط إيه. انا جوة حلة الضغط نسيت كل حاجة براها. نسيت انا كنت عاملة ازاي وشكل الدنيا ايه والتعامل مع الناس بيبقي ازاي. انا حتى مبقتش عارفة الناس بتعامل مع امهاتها ازاي؟ ولا وجود ام في البيت يعني ايه؟ انا مبقتش عارفة يعني ايه كلمة احساس ومشاعر ودموع وفرح وزعل انا بقيت كائن مسمط بدون ملامح كل حاجة عندي واحدة. بقيت زي اللحمية جوة الحلة كل شوية حد يجي يطمئن ان الحلة تمام ومقفول عليها ومتماسكة بس اللي جوة اتهرس وداب مش مهم. معنديش امل في اي حاجة ولا شايفة نور في اخر الضلمة ولا شايفة الضلمة نفسها انا مش شايفة خالص وكل حاجة شبه بعضها وكل الايام شبه بعضها وكل الناس شبه بعضها وكل المشاعر شبه بعضها الحلو والوحش. كنت عاملة برودكاست فيه ناس كتير اوي بيعت كل شوية للناس اقلهم متنسوش ماما ادعولنا افتكروننا متنسوهاش و و إلى اخره لقيت كذا حد على فترات باعت يقولي معلش شيلينا من البرودكاست دي احنا مش قادرين نستحمل ده غير الناس اللي عملت بلوك والناس اللي عملت انفريند وانفلو لحد ما قررت امسحها خالص وقلت مالهاش لازمة كل ده مش فارقلي خالص. اللي فارقلي ان فعلا عندهم حق محدش بقي طايق يعرف رسالة واحدة سلبية وكله محصل بعضه والناس اللي جوة دي هتتنسي وحياء كل حد هتستمر واللي جوة بس اللي حياته واقفة كل حاجة بترجع لأصلها وكل حد بيرجع لحياته وكل حاجة بتتنسي. الحياة بقت شاقة اوي وصعبة اوي وصعب تتعاش اوي. كل اللي حوالينا بؤس ووجع وعيا وسجن وضلمة وبعد وفراق وحرمان ونكد وخنق وزعيق وتعب اعصاب ودوشة وزحمة معنديش اي امل في بكرة مش شايفة غير سواد ومعرفش هقابل ماما تاني ولا لا وانا شايفة كل يوم معتقلين بيموتوا في السجن بسبب سنهم مع مرض الكورونا ومحدش يقولي بقي هتخرج وقريب وكل الهري ده عشان انا بتكلم برة الدائرة دي انا بتكلم في احساس انساني بحت بالوجع البشع

كل الكلام مبتذل وكل كلامي مالوش لازمة. بس حلة الضغط هتنفجر وانا فتحت الغطا لعل وعسى اشم هوا

<http://tiny.cc/f6xrqz>

بيان من أسرة الصحفية سولافه مجدي

أيام وتكمل الصحفية سولافه مجدي ٢٠٠ يوم في الحبس الاحتياطي، بعد القبض عليها مع زوجها المصور الصحفي حسام الصياد والكاتب الصحفي محمد صلاح، في ٢٦ نوفمبر الماضي، واحتجازهم بتهمة مشاركة جماعة إرهابية ونشر أخبار كاذبة في القضية ٤٨٨ لسنة ٢٠١٩ حصر أمن دولة عليا. منذ احتجاز سولافه تقدم محاموها بعدة تظلمات للنائب العام على قرارات تجديد حبسها من قبل نيابة أمن الدولة، خاصة مع عدم مواجهتها بأية أدلة على الاتهامات الموجهة إليها، فلا يعرف محاموها حتى اليوم ما هي الأخبار



الكاذبة التي نشرتها؟ وما هي الجماعة الإرهابية المتهمه بالانضمام إليها؟ وعلى أي أساس بنيت هذه الاتهامات؟

ولم يتم الالتفات لأي من هذه التظلمات!

في فبراير الماضي، تقدم المحامون باستئناف على قرار تجديد حبسها الأتوماتيكي أمام محكمة الجنايات، مطالبين المحكمة بإخلاء سبيلها هي أو زوجها، تطبيقا للقانون ولمبدأ المصلحة الفضلي للطفل، حيث لديهما طفلا يبلغ من العمر 6 سنوات!

ولكن المحكمة قررت استمرار احتجازهما على ذمة القضية!

منذ قرار تعليق الزيارات في السجون الصادر في ٩ مارس الماضي، ضمن الإجراءات الاحترازية لمواجهة فيروس كورونا، انقطعت أخبار سولافة تماما عنا، ومنذ ذلك الحين لا نعرف نحن أسرتها، أو المحامون، أي شيء عنها وعن وضعها الصحي، بسبب قرار تعليق جلسات النيابة والمحاكم، ثم استئنافها وتجديد حبس سولافة من دون مثلها أمام المحكمة، بل ومن دون حضور المحامين لهذه الجلسات! ٣ أشهر تقدمنا فيهم بعدة شكاوى للنائب العام، مطالبين بتمكيننا من التواصل مع سولافة عبر الخطابات، أسوة ببقية السجينات المحتجزات في سجن القناطر، كانت آخرها شكوي تقدمنا بها الخميس قبل الماضي الموافق ٤ يونيو، والتي جددنا فيها مطلبنا بتمكيننا من استلام خطاب منها للاطمئنان عليها، بعد تزايد قلقنا على وضعها الصحي في ظل انتشار فيروس كورونا، خاصة وأنها تعاني من حساسية صدرية مزمنة.

كما تقدم المحامون بدورهم بعدة التماسات وتظلمات، وكالعادة، لم يستجب أحد، حيث ذهبنا للسجن مرة أخرى الخميس الماضي الموافق ١١ يونيو لتسليم بعض المتعلقات المسموح بها من قبل إدارة السجن، ومحاولة استلام خطاب من ابنتنا، ولم يسمحوا لنا هذه المرة أيضا بخروج خطاب. وعند سؤالنا المسؤولين على البوابة عن صحتها ووضعها لا نسمع إلا عبارة (منعرفش)!!

٣ أشهر لم يلتفت أحد لأي من شكاوينا، ٣ أشهر لا نسمع عن ابنتنا سوي (منعرفش)، مع الأخذ بالاعتبار الحالة النفسية السيئة لطفلها ذو الست سنوات، والذي يستمر في السؤال عن أمه، التي اعتادت منذ اعتقالها على إرسال خطابات له في كل زيارة.

سنقدم اليوم بشكوى جديدة للنائب العام، وسنتوجه الخميس مرة أخرى إلى سجن القناطر، في محاولة جديدة لاستلام خطاب منها. ونأمل هذه المرة أن تمكننا إدارة السجن من ذلك!

كما نطالب مجلس نقابة الصحفيين المصرية برئاسة النقيب ضياء رشوان بالتدخل، والاطمئنان على صحة وسلامة صحفية مصرية تعمل بالمهنة منذ ١٠ سنوات، ومحتجزة منذ أكثر من ٦ أشهر من دون دليل اتهام، ومن دون محاكمة! وحتى الاطمئنان على صحتها، نحمل نحن أسرة الصحفية سولافة مجدي وزارة الداخلية متمثلة في قطاع مصلحة السجون وإدارة سجن القناطر مسؤولية سلامتها، ونجدد مطالبتنا للنائب العام بإخلاء سبيلها في أقرب وقت حفاظا على صحتها، ومن أجل مصلحة طفلها.. خاصة مع استمرار تجديد حبسها على الورق من دون حضورها أو حضور محاميها أمام غرفة المشورة بمحكمة الجنايات منذ بداية مايو الماضي، بعد انتهاء فترة تجديدها ال ١٥٠ يوم أمام النيابة.

فيديو: زوجة مصطفى النجار شيماء عفيفي تتحدث عن آخر تطورات قضية إجلاء مصيره.

<http://tiny.cc/00qerz>



بيان من أسرة الصحفي محمد منير

قامت قوات الشرطة السرية باختطاف والدي الصحفي محمد منير الساعة الثالثة فجر اليوم من شقتنا بمنطقة الشيخ زايد وقد اقتادته القوة الأمنية إلى مكان مجهول.

وقامت الأسرة بإبلاغ نقابة الصحفيين والمجلس القومي لحقوق الإنسان عن واقعة الاختطاف، وتأمل منهما التحرك السريع لمعرفة مكان احتجازه، وحضور التحقيقات معه، حيث أنه عضو بنقابة الصحفيين، ويلزم القانون أجهزة الدولة

بإبلاغ النقابة قبل القبض على صحفي خاصة إذا كانت التهمة الموجهة له تخص النشر والإعلام وللتذكير فإن ما حدث مع الوالد محمد منير جاء بعد مشاركته في لقاء تلفزيوني على قناة الجزيرة تحدث فيه عن أزمة الكنيسة المصرية ومجلة روز اليوسف، وهو مجرد تعبير عن الرأي، ولم يقل في كلامه ما يسئ للوطن أو للوحدة الوطنية بل إنه أحرص الناس على هذه الوحدة الوطنية وتاريخه السياسي والإعلامي يشهد بذلك، كما أنه حذر في هذا اللقاء من استغلال البعض لهذه الأزمة لإثارة الفتنة الطائفية

<http://tiny.cc/re8vqz>

د. ليلي سويف

"بعد انتظار حوالى ٥ ساعات، غالبا كان الغرض الرئيسي منه ان الناس تكون مشيت عشان أي مواجهة تحصل مع السادة المسؤولين عن بوابة السجن مايقاش في أهالي موجودين وهي بتحصل، أخذوا مني الحاجات اللي جايهاها - اكل وادوية وغيار داخلي ورفضوا دخول المنظفات- لكن قالوا لي مافيش جوابات فأنا رفضت امشي. وبدأنا في الحوارات العبثية بتاعة انهم يحاولوا يصوروا الموضوع زي ما يكون لطف منهم أنهم دخلوا الحاجات!

بعد شوية قالوا طيب هندخل الجواب بتاعك بس مش هينفع نطلع جواب، وطبعا كل محاولاتي اني افهمهم ان الكلام ده كلام فارغ لأن طول ما ماطلعليش جواب فأنا حتى معرفش هل الحاجات اللي بياخذوها مننا بتوصل بجد ولا لأ.

خلصنا فقرة المحايلة وانتقلنا لفقرة التكدير. الأول قالوا ان لو حافظل قاعدة جوة ماينفعش يبقي معايا الموبايل فسلمت الموبايل (ده الوقت اللي مني ماكانتش عارفة توصلي فيه)

وبعدين انتقلنا لأنهم لازم يقفلوا ولازم أخرج برة ولما رفضت المقدم محمد النشار قال لي انه كدة هيضطر يعمل لي محضر فقلت له يتفضل،

وبعدين قال انه طلب قسم المعادي وانه متحفظ عليا، وبعدين مسك ايدي وبدأ يشدني ناحية الباب عشان "قسم المعادي هيبجوا ياخدوني"

شدني من دراعي لحد ما خرجني برة وأنا طبعا عموما كواحدة من أنصار السلمية وكدة (: مش بأقاوم التصرفات اللي بالقوة. أول ما طلعتي برة قفلوا الباب واختفي وخلص. المخبرين قعدوا شوية يحاولوا يقنعوني اروح وبعدين اختفوا هم كمان. أنا قاعدة هنا ومش مروحة"

<http://tiny.cc/33t2qz>

منى سيف (22 يونيو)

العجيب اصلا اننا كنا ماشيين وهم شافوا ده

قولنا نمشي نروح ناخذ دش ونغير ونرجع في معاد طبيعي فيه بوابة السجن شغالة وبيستقبلوا أهالي لمينا الحاجات، رحت جبت العربية ووقفت جنب ماما وسناء عشان نشيل الحاجات، ويادوبك بانزل لقينا الستات دول جايبين، اتنين منهم جولي وقالولي عايزين نعمل مكالمة تليفون، وبعدين ابتدوا يشدوني من هدومي ويشاوروا على شنطتي، ابتديت ازعق وفي اللحظة دي شوفتهم بيضربوا ماما وشوفت سناء بتتشد من شعرها ورأسها ناحية كابوت العربية. بنصرخ في الداخلية واقفين يتفرجوا. ميكروباص معدي بالصدفة الرجالة اللي فيه كتر خيرهم نزلوا يحاولوا يحوشوا بس كانوا مرتبكين جدا وعمالين يقولوهم "انتو بتعملوا ايه ده انتو عند الحكومة". حاولت اقفل العربية بس واحدة منهم جت من الناحية الثانية خطفت الشنطة. كانوا خلاص سرقوا كل حاجة تانية مع ماما وسناء

حاولت امسك في الشنطة فسحلوني من شعري عالاسفلت وشدوا الشنطة لحد ما دراعها اتقطع فمشيوا بيها. وبعدين مشيوا

الغضب والذهول خلانا نقف زي المجانين نزعق في بتوع الداخلية على انهم جايبين لنا بلطجية وانهم واقفين بيتفرجوا علينا بنتضرب ونتسحل، لقينا الستات راجعين ومعاهم عصيان (او عصاية واحدة بصراحة مش فاكرة). ماما كانت بتحاول تعدي من الحاجز اللي برة وتدخل الساحة بتاعة انتظار الأهالي فالمخبر زقها لبرة ناحيتهم. المرة دي اتكاتروا اساسا على سناء واتضربت بالشومة/ العصاية في كل حته



في جسمها وراسها. عصابة مطلوقين وعارفين انهم فوق القانون والمحاسبة وان ولا نائب عام هيتحرك، ولا السيسي هيفرق معاه ان اي حد يتضرب ويتسحل على باب سجن عشان بيطالبوا بحد ادني من حقوقهم. عامة الي حصل النهاردة بيقول بشكل و اضح انتو مين واحنا مين. نحمد ربنا على نعمة اننا بني ادمين نضاف و متمسكين بالحق رغم كل وساختكم

<http://tiny.cc/17h5qz>

سنا سيف



بعقولنا ستات بلطجية ضربونا قدام باب السجن والعساكر والضباط كانوا واقفين بيتفرجوا مخبر واحد بس منهم علق قالهم طلعوهم برا الحاجز متضربوهمش هنا. كلنا كويسين رجعنا البيت، بس موبيلي وموبايل ماما أتسرقوا محدش يكلمنا عليهم. هكشف بس عشان ضربوني على رأسي بعصيان كتير شوية وعينيا مزغللة وبعدين هنكمل.

<http://tiny.cc/rbi5qz>

ليلي سوييف

امبارح عملنا بلاغات بالتلغراف للنائب العام بخصوص الي حصلنا، وبعتنا أيضا شكوى للمجلس القومي لحقوق الانسان النهارده حنروح للنائب العام نطلب التحقيق في الي حصلنا ونشوف حيعمل ايه دي الشكوي الي بعتناها للمجلس القومي لحقوق الانسان وارفقنا بيها مجموعة صور لإصابات سناء: السيد الاستاذ محمد فايق / رئيس المجلس القومي لحقوق الانسان بعد التحية مقدمة لسيادتكم / ليلي مصطفى سوييف



والدة علاء أحمد سيف الاسلام عبد الفتاح حمد، المحبوس احتياطيا بسجن شديد الحراسة ٢ بمنطقة طرة ب، على ذمة القضية ١٣٥٦ لسنة ٢٠١٩ حصر أمن دولة الموضوع:

تعرضت صباح اليوم حوالي الساعة الخامسة صباحا أنا وبناتي مني أحمد سيف الاسلام عبد الفتاح وسناء أحمد سيف الاسلام عبد الفتاح، أثناء وقوفنا أمام بوابات منطقة سجون طرة ب، لهجوم من مجموعة سيدات قاموا بضربنا وضرب وسحل بناتي من شعرهم كما قاموا بسرقة كافة متعلقاتنا، ثم رحلوا دقائق وعادوا مرة أخرى بعصي واعتدوا علينا وضربوا بالأخص ابنتي سناء بالعصي التي يحملونها، وقد تم كل هذا على مرأى ومسمع من قوة حراسة بوابة منطقة سجون طرة ب، ولم تتدخل قوة الحراسة لوقف جريمة عنيفة تتم أمام أعينهم، بل اني حين حاولت أنا وسناء الاحتماء ببوابة السجن قام الأمناء المكلفين بالحراسة بدفعنا للخارج تجاه من يقمن بالاعتداء علينا وقال لهم أحد المخبرين نصا "ماتضربوهمش هنا خدوهم بعيد"

لقد نتج عن هذا الاعتداء اصابتنا جميعا إلا أن اصابات سناء كانت شديدة للغاية، ورافق مع هذه الرسالة صورا لبعضها. كما نتج عنه سرقة حقائبنا بما تحتويه من نقود وكروت بنوك وبطاقات تحقيق شخصية وموبيلات وغيرها من المتعلقات.

نحن نتهم ضباط الداخلية بتدبير هذا الاعتداء، ونخص بالذكر المقدم محمد النشار المسئول عن قوة حراسة منطقة سجون طرة ب. ذلك انه قد تعمد في وقت سابق ابعادنا عن موقفنا أمام البوابات في منطقة تغطيها كاميرات المراقبة، عن طريق استدعاء مجموعة من العاملات بالسجن لدفعنا تجاه الاتوستراد بعيدا عن مدي كاميرات المراقبة. وأي كان دور المقدم محمد النشار في الاعتداء الذي تم سواء كان التدبير أو التحريض أو التواطؤ، فهو الضابط المسئول عن قوة الحراسة التي تمت الجريمة على مرأى منها ولم تتدخل لمنعها، بل ساعدت على ارتكابها

جدير بالذكر أن سبب تواجدنا أمام بوابات منطقة سجون طرة ب، هو نعت إدارة السجن في تسليمنا رسائل من علاء تظمتنا على أحواله في محبسه، فقد كانت آخر رسالة تلقيناها من علاء يوم ٦ يونيو سبقتها رسالة يوم ١٨ مايو ورسالة يوم ٩ أبريل. أي أن مجمل ما تلقيناه من رسائل في ثلاثة أشهر الزيارات فيها موقوفة وكذلك حضور الجلسات هي ثلاث رسائل. وكانت إدارة السجن قد وعدتنا أن تنتظم الرسائل بعد ذلك اسبوعيا مع تسليم الطبلية، ثم بتاريخ ١٣ يونيو تسلموا الطبلية ولم يسلمونا رسالة واعتذروا عما ادعوا انه سهو، ووعدوا بأن نتسلم رسالة يوم ٢٠ يونيو، فلما نكصوا بوعدهم قررت البقاء أمام السجن في انتظار أن يوفوا به.

وغني عن البيان أنه في ظل تعليق الزيارات وامتناع الداخلية عن احضار علاء وغيره من المسجونين لحضور جلسات تجديد الحبس رغم أن الجلسات تعقد في معهد امناء الشرطة بطرة الذي يبعد عدة امتار عن مكان حبس علاء، فإن اصرار إدارة السجن على منعنا من التواصل معه، ذلك الاصرار الذي يصل إلى حد التحريض على ارتكاب جريمة كي يردعونا عن الاستمرار في المطالبة بحقنا المنصوص عليه في اللوائح أن نتلقى رسائل أسبوعية منه، كل ذلك يثير القلق على أحواله وأحوال غيره من المساجين، خاصة

مع تواتر أخبار عن أن بعض السجون ومنها سجون في منطقة طرة ب تحديدا قد صارت بؤرا لانتشار مرض كورونا، ويثير الريبة الشديدة في أن هناك ما تعتمد الداخلية اخفاؤه. أخيرا نود أن نذكر سيادتكم أن علاء قد سبق الاعتداء عليه داخل محبسه في سجن شديد الحراسة ٢ وأن الانتهاكات بحقه لم تتوقف في أي وقت منذ ايداعه ذلك السجن، وكنا قد تقدمنا لسيادتكم وللنائب العام ببلاغ بخصوص هذه الانتهاكات بتاريخ ١٣ اكتوبر ٢٠١٩ وتفضلوا سيادتكم بقبول فائق الاحترام

<http://tiny.cc/p317qz>

منى سيف (23 يونيو)

فاحنا كنا بنشتكي من حرماننا من التواصل مع علاء اخدوا سناء وحرموننا من التواصل معاها. كملوا كملوا وساخة واجرام وخلوا كل حاجة عيني عينك، وياريت النائب العام ينقل مكتبه لاطوغلي أو مدينة نصر او العباسية وخلي الدنيا عالمكشوف وبوضوح
القرار: حبس ١٥ يوم

<http://tiny.cc/6l27qz>



محتاجة ابعدها عن هنا وابقى خارج التواصل كام ساعة الملم نفسي، وأول اما نعرف سناء اتنقلت فين هنظمنكم، وطبعا لو جالنا أخبار عن علاء
بس قبل ما ينتهي إلسوم ده بالنسبة لي هنا محتاجة أقول حاجة لكل مسؤول في الدولة من السيسي لأمن "دولته" للنائب العام التابع لأمن دولته
لو متصورين ان اللي بتعملوه هيسكتنا فانتو حقيقي مش فاهمين أبسط حاجة عننا كأسرة
مش ان احنا ما بنخافش، لا بني ادمين وبنخاف وفاهمين مستوي جبروتكم وعنقكم وبجاحتكم وازدرايكم
لكل ما هو عادل أو انساني أو رحيم
وعارفين ان الأذي مش بعيد عننا، خاصة في لحظة زي دي فيها كل المؤسسات بتخضع وبتشتغل
لحساب خطة أمن الدولة الانتقامية بالشكل ده، بالشكل اللي يخلي المستشار جورج سعد مدير المكتب
الفني للنائب العام يقفل على نفسه المكتب في المبني اللي احنا فيه بنحاول نقدم بلاغ وما يستقبلناش
ولا يرد على اي اتصالات -هو والمستشارين النائب العام حمادة الصاوي ومدير ادارة حقوق الانسان هاني
جورجي - عشان يتيحوا الفرصة لأمن الدولة انهم يخطفوا مواطنة جايلهم تقدم بلاغ من على باب
مكتبهم .
احنا مش هنسكت لأن الواقع اللي انتو بتحاولوا تفرضوه علينا لا يمكن التعايش معاها .

أنا كنت باحاول الفترة اللي فاتت اوازن بين أمور مختلفة من حياتي، ومابقاش مستنزفة تماما في الخناق معاكم، بس خلاص من اللحظة دي تفرغ تام لجرايمكم وانتهاكاتكم ولاننا نقول ونشاور على كل مسؤول مشارك في الجريمة ونرفع صوت كل ضحية.

لو في يوم هتتحاسبوا اهو نبقي ساهمنا في سرد تاريخكم المعفن ولو مش هتتحاسبوا فعلى الأقل مش هتنعموا بالواجهة "المحترمة" المزيفة وكل يوم بني ادمين اكثر هيعرفوا حقيقة جرايمكم

ولو اتحبسنا .. تمام. السجن مهلك ومش ممكن يبقي حاجة بنسعي لها، لكن الأكيد انه على قلبي أهون من كابوس تقبل عيشة فيها حياة أخواتي الاتنين وصحة وسلامة أي مهددة طول الوقت بالشكل ده مش هنسكت

<http://tiny.cc/3m27qz>

عن زياد العليمي

بعد عدة ساعات (تقريبا ١٢ ساعة من دلوقت) يكون مر على خطف زياد سنة كاملة!!

سنة، هو وزماليه اللي اتلفقت لهم قضية باسم "تحالف الامل" منهم اتنين زملا صحفيين معاه في الزنزانة (هشام فؤاد وحسام مؤنس) واتنين من المجتمع المدني ما اتشرفتش بمعرفتهم شخصيا، لكن اتعرفت على أسرهم على باب السجن في انتظار الزيارة (احمد تمام وحسن البربري) ورامي شعث ابن نبيل شعث المستشار السابق للرئيس الفلسطيني.. وغيرهم اسماء كتير



ما اعرفهاش شخصيا، ولا همه يعرفوا بعض!!

بعد ما اتورطوا في خطف زياد وما نجحوش في اخفائه، بقي مطلوب تليفق قضية على وجه السرعة، تتحط فيها اسماء اي حد مغضوب عليه، طلع بقي اخوان او يساري او ليبرالي. مش مهم.. وعشان يخلصوا من ورطة بيان الداخلية اللي قال اخوان؛ راحوا مغيرين التهمة في النيابة إلى كونه "تحالف بين عناصر اثارية واخوان"!! اي كلام! هو الكلام بيلزق!!

سنة كاملة بحجة تحت التحقيق!! وما قدروش - لغاية النهارده - يوجهوا لهم اتهام رسمي! رغم الزيتة والزمبليطة اللي اتعملت للتغطية على خطف زياد!! وبيان الداخلية المضحك اللي طلع بعد ساعات من انكشاف خطفه بيقول انهم احبطوا "مؤامرة لتخريب البلاد" تتولاها ١٩ شركة وكيان اقتصادي اخواني "على رأسها زياد العلمي"!!.. اللي هي يعني شر البلية ما يضحك؛ زياد العلمي؟؟؟؟ على راس مؤامرة اخوانية؟؟؟؟ عبر ١٩ شركة وكيان اقتصادي!!!

وفورا، التليفزيون يذيع: اوعي يا جدع! الحق يامواطن! المؤامرة الكبرى!!.. وصور لخزنة، وشوية رزم فلوس على تراييزة، ما تساويش حتى ايراد قهوة بلدي في يوم!! ومن غير حتى يافطة واحدة تقول الخزنة

والفلوس دي بتاعة انهى شركة من التسعناشر اللي على راسها زياد!! ومن غير حتى تفتيش شقة زياد ولا مكتبه -لغاية النهارده- !!
للعثور على أدلة ولو ملفقة!!

طبعا المطبلاية يزيطوا، واللي منفسن وبيحقد على زياد لاي سبب - ومنهم ناصرتحية ويسارتحية وزياطين - يشمت، وما يقدرش يداري الخسة ويعلن الشماتة على صفحات الفيس بوك!! او صحيفة تدعي إلسارية!! فيزداد احتقار الناس لهم ولها!!

وبقي اسم القضية فضيحة في حد ذاته للمسئولين عن سجنهم "تحالف الأمل!!!!"
طبيعي، في البلد اللي عندها سجن اسمه سجن المستقبل، لازم يتسجن اللي عندهم أمل!! ومش مهم حتى تلفيق تهمة بإحكام!! عندنا قانون يسمح بسجن المواطن احتياطيا سنتين تحت التحقيق!! وبعد السنين مش لازم حتى يحال للمحكمة، ممكن يخرج وقبل ما يوصل البيت تتلفق له قضية تانية يقعد على ذمة التحقيق فيها سنتين تانيين وهكذا، مش محتاجين نتعب نفسنا وندور على ادلة!! هو كده!! وبمجرد ما المواطن يتسجن لازم طبعا لزوم اللقطة يطلع قرار بالتحفظ على امواله في البنوك واملاكه!! لغاية ما يخلص التحقيق اللي مش حيخلص ابدًا!!

.. طب اتحداكم تنشروا بيان بحسابات زياد واملاكه!!!! والنبي لانتمو ناشرين!! مش كده بس! اتحداكم تنشروا بيان بحسابات زياد وكل اقاربه حتى الدرجة الثالثة واملاكهم!!
اختشوا على دمكم الله يكسفكم، قولوا
اعتقال وخلص، هو حد بيراجع وراكم؟

حيجي يوم وتعدل المايلة، وكل واحد حيدفع تمن اختياره!! يمكن فيه ناس تدفع تمن اختيارها من حريتها ومن قوتها، او حتى من حياتها، لكن حتفضل رافعة راسها وتسبب لاولادها اسم يشرف ويرفع الراس!! لكن فيه ناس حتدفع التمن من كرامتها واحترامها، وحتسب لاولادها الفضيحة والعار!!
"راح تنتهي، ولا بد يوم راح تنتهي، مش انتهت أحزان من قبلها؟"

#الحرية_لزياد_العلمي

#الحرية_لهشام_فؤاد

#الحرية_لحسام_مؤنس

#الحرية_لأحمد_تمام

#الحرية_لحسن_البربري

#الحرية_لرامي_شعث

دول اللي عرفت اساميهم من المتهمين بالأمل

#الحرية_لكل_سجناء_الرأي_اللي_نعرفهم_واللي_ما_نعرفهم_مش

#الحرية_لمصر_المحبوسة

<http://tiny.cc/p6i9qz>

عودة تدريجية

كالعادة كنت مبعثرة من نفسي لحد ما خالد على خرج من التحقيق مع سناء وابتدي يحكيلنا هي اتكلمت واتصرفت بهدوء وثبات ازاي، وانها أكدت عليه يطمنا قلبي هدي .. حبة الفترة اللي فاتت بسبب ظروف الكورونا أنا ماكنتش باشوف أختي خالص، كل حد فينا ملتزم بالتباعد الاجتماعي في بيته قدر الامكان.



بس فجأة قضينا ليلة كاملة مع بعض الأسرة كلها، صحيح عالرصيف في الاوتوستراد وفي أجواء توتر متقطعة انتهت نهاية عنيفة، لكن فيها لحظات هتفضل نوادر وقصص نحكيها لبعض ولحبايينا سنين قدام

بس كمان بسبب الضرب اللي تعرضتله أنا كنت بايئة معاها هي وماما الليلة اللي قبل ما نروح النائب العام، وسهرنا للفجر نحكي مع بعض كانت أول مرة من كتير اوي اوي نلاقي فرصة نحكي واقولها حاجات بافكر فيها عن الشغل وتشاركني هي كمان .. اتكلمنا عن الحب والعائلة واحساسنا الفترة دي والشغل والمستقبل المبهم والقسط والكلاب واتريقنا على حالنا، وهرجنا على قد ايه رغم الكدمات لكن احنا وجسمنا فاجئنا نفسنا وكنا بنعمل خطة ازاي هنهرب من عائلتنا:

واتكلمنا كتير عن علاء، كتير اوي اوي بشكل حسسنا انه سامعنا وأكد عارف كل اللي مرينا به. دلوقتي وأنا أهدأ، افتكرت كل الحاجات دي وتاني ملي قلبي احساس كان تاه عني "في قلبي أنا عارفة اننا هنبقي كويسين، وان الرابط اللي بينا هيطلعنا من كل ده .. حيث ان ده أمر مفروض علينا، فاحنا مع بعض هنعديه، وهنخلي بالننا من بعض وهنتعافي مع بعض.. ماهما حشروا ما بينا مباني وأسوار وعربيات ترحيلات وبني ادمين في بدل منفوخين" يا مستشار حمادة الصاوي

يا نائب عام يا اللي بتتجاهل كل بلاغات تخص التعدي علينا وانتهاك حقوقنا، وبتسمح لجهاز تحول لتشكيل عصابي يخطفنا لما نلجألك عشان نوثق انتهاكات ونقدم بلاغ ونطلب الحماية، وفي نفس الوقت مالى صفحاتنا سخام عن "قيم الأسرة والعائلة" .. ركز معنا الفترة دي عشان تعرف بجد قيمة الأسرة والعائلة والمحبة اللي تقدر تتصدي لكل شرورك

د. ليلي سويف

نشرت صفحة Egyptian Public Prosecution النيابة العامة المصرية خبر تحت عنوان: «النيابة العامة» تجري تحقيقاتها في واقعة ادعاء خطف «سنا سيف»، والتعدي عليها وشقيقتها ووالدتها صباح أمس.

الاستاذ Khaled Ali نشر بوست طويل اعاد فيه سرد الوقائع وخلفتها وملابساتها فوفر عليا مشكورا إني اضطر أعمل ده علشان أوضح كم التعقيم والتضليل في الخبر المذكور فاضل بس شوية ملحوظات أحب اشير لها

التضليل في الخبر يبدأ من العنوان، العنوان يقول " «النيابة العامة» تجري تحقيقاتها في واقعة ادعاء خطف «سنا سيف»، والتعدي عليها وشقيقتها ووالدتها صباح أمس" لما تقرأ العنوان تتوقع إن ده يكون الموضوع الرئيسي للخبر، ثم تقرأ المتن فتجد فقرة واحدة قصيرة عن واقعة الخطف، ثم فقرتين طوال عن التحقيق مع سنا في التهم الموجهة إليها بناء على تحريات الأمن الوطني، يبقى الموضوع الرئيسي للخبر واللي كان مفروض يعكسه العنوان حتى لا يضل القارئ هو التحقيق مع سنا كمتهمة في نيابة أمن الدولة.

فيما يتعلق بواقعة ادعاء الخطف كل ما يذكره الخبر إن نيابة القاهرة الجديدة "أجرت تحقيقات بالواقعة طلبت فيها تحريات مباحث الشرطة حول واقعة الخطف، فوردت مبينة ضبط المذكورة اليوم نفاذاً لإذن «النيابة العامة» بضبطها." لا يعلمنا الخبر المنشور إذا ما كان التحقيق قد انتهى، أم أن نيابة القاهرة الجديدة تنوي استكمالها عن طريق السماع لسنا ولشهود الواقعة وعن طريق تفريغ كاميرات المراقبة حول مكتب النائب العام أو حتى سؤال من قاموا بخطف سنا ليه لما المطلوب ضبط المذكورة نفاذاً لإذن «النيابة العامة» بضبطها اللي هو صادر من يوم ٢١ يونيو ما قبضتوش عليها من أمام بوابات طرة اللي هي كانت قاعدة قدامها يوم ٢١؟ وليه ما قبضتوش عليها من بيتها اللي هي كانت راقدة فيه يوم ٢٢؟ أما فيما يتعلق بادعاء التعدي فالمسألة أوضح، ليس هناك (في حدود المعلومات الواردة بالخبر المنشور) تحقيق مستقل في واقعة التعدي على سنا وعلى ميني وعلا بل هناك أقوال سنا التي اثبتتها أثناء التحقيق معها في نيابة أمن الدولة ، فمعلش يا صفحة النيابة العامة ده ما اسموش إن النيابة بتحقق في واقعة التعدي علينا

ختاماً أحب أقول إن في الواقعتين، واقعة التعدي علينا وواقعة خطف سنا من أمام مكتب النائب العام في تعمد واضح لاستخدام أساليب البلطجة والترويع، فقبل الاعتداء علينا بعدة ساعات أثناء ما كنا قاعدين قدام منطقة سجون طرة خلال ساعات حظر التجول حضرت قوة أمنية كبيرة، وتفقدتنا وسألنا أحد الضباط عن سبب تواجدها في هذا المكان وكان ممكن يقبضوا علينا بتهمة خرق حظر التجوال، وطبعاً كان ممكن كمان بما إن النيابة بتقول ان أمر ضبط واحضار سنا كان صدر في ذلك اليوم انهم ينفذوه ويقبضوا عليها، لكنهم لم يفعلوا، كل اللي عملوه انهم قعدوا يتفرجوا علينا ويعملوا اتصالات بالموبيلات وبعدين مشيوا

وبالنسبة لخطف سناء زي ما هو واضح انهم كان ممكن يقبضوا عليها في أي وقت، لكن هو الغرض كان عمل مشهد رعب وإن مشهد الرعب ده يتم قدام مكتب النائب العام تحديدا. الرسالة واضحة، ماحدث حيحميكوا من البلطجة ولا حتى النائب العام، الرسالة وصلت وعن نفسي أنا كانت واصلة لي من زمان وإن كنت لا أنكر إني لم اتوقع درجة الفجاجة التي حملتها
فاضل عندي تساؤل أخير والحقيقة انه اجابته ماتفرقش كثير بس برضه الفضول في تفسير الظواهر من الصفات اللي الواحد لم يتخلص منها بعد، يا تري الرسالة دي مصدرها الجهات المسماة بالأمنية بس، ولا مصدرها أيضا سيادة النائب العام علشان مانفضلش نوجع دماغه ونضيع وقت موظفيه في شكاوى مالهاش لازمة حول انتهاكات الأجهزة الأمنية

<http://tiny.cc/l1l9qz>

عن د. عمرو أبو خليل

حد يبلغ الدكتور أحمد عكاشة، مستشار السيسي للصحة النفسية، إن زميله الدكتور عمرو أبو خليل استشاري الطب النفسي والذي كان ينافس في انتخابات رئاسة الجمعية المصرية للطب النفسي منذ سنوات، معتقل دون تهمة منذ 2 أكتوبر 2019 من داخل عيادته ووسط مرضاه وإنه محبوس في العقرب أسوأ سجن في مصر، وإنه مصاب بكورونا والمفروض يخرج يتعالج فوراً ويرجع لشغله!



<http://tiny.cc/bgm9qz>

عن سناء سيف

ماما وصلت أمانات واحتياجات أساسية لسناء في القناطر بعد انتظار ساعات عشان طبعاً إشارة الأمن الوطني. بس عارفين ايه اترفض يدخل؟ كل الأدوية. الأدوية والمراهم اللي هي محتاجها عشان اصباتها الأخيرة. والأدوية اللي هي أصلاً بتأخذها بشكل يومي

<http://tiny.cc/wbqerz>



عن محمد عبد الغني




٢٨ يونيو الساعة خمسة الفجر، زي دلوقتي بالضبط يكون عدي ست شهر
كاملين على نزول محمد اخويا من البيت متكلبش خلفي وسط عشرات من قوة
أمنية ضخمة. ست شهر كاملين شفناه فيهم أربع مرات لا غير لدقائق لا تتجاوز
النصف ساعة، لكن شفنا كثير من الألم وتجليات من الرحمة خلالهم. لما يخرج
بالسلامة هنبقى نحكي عن المشاهد إلى كان مستحيل نعيشها وتغير فينا إلا في
طرة. عن الضابط إلى طوب الأرض في السجن بيدي له، طابور زيارة كامل بدون مناسبة بيدي له ولأهله
على رحمته بيهم وتسهيله بكل الممكن في صلاحياته ومعاملته الأدمية اللي ما تشبهش السجن في أي
شيء. عن الضابط إلى محدش بيخاف يدخل مكتبه يستأذن بطلب ولا بيخاف يتهدل لو طلبه مرفوض،
كأنهم كانوا تجسيد لرحمة ربنا تشمل عباده المكومين في كل وقت. عن أمين الشرطة إلى ما بيرضاش
ياخد ولا مليم عشان مستحرم وبيدخل المسموحات الطبيعية في الزيارة من غير أي تعنت لدرجة ان
الناس بتستبشر لما تشوفه وانه هيرحمهم يوم من إلى بيشفوفه كل مرة، رحمة ربنا جعلت الأمين بجد
أمين ورحمتنا بيه. عن الساعة إلى قبل ما كتفي يتخلع مباشرة من أحمال الشيل، وخلص واقفة لوحدي
وعايزة ارجع واروح ومش قادرة أكمل، والاقى ايد بتتمدي وتشيل معايا وتساعدي اطلع عربية السجن،
ولما ألف القاه رائد معدي بالصدفة من جنبنا، ساعدي ومشي، في مشهد لسه فاكهه لطفه لحد النهاردة
واد ايه كان مش شبه ثقل الشيل والغضب إلى في وشوش للناس والتعنت إلى في طابور التفتيش والمهانة
إلى في حجرة السيدات والانتظار الطويل لساعات واقفين على رجلنا، فاكراه عشان كان خارج
السياق ومش شبه اي حاجة أعرفها غير رحمة ربنا. عن الأهالي إلى عرضوا يعينوني في تعبي ورأفوا بمجيتي
وحدي كل مرة، عن بنت الحلال اللي بتشيل عني مشوار، والطيبة إلى افكرت محمد بفاكهة ، والأصيلة
إلى عملت حسابه في أكل زوجها، والجدعة جدا إلى بتوصل رسايله وتطمنا عليه، مفيش أي مصلحة
جمعتنا ولا هيثابوا بأي شيء اللهم الا رحمة ربنا. كنت بتسائل الناس بتتحمل السجن ازاى فترات طويلة
وانا بنهار بالفعل على آخر ذرات من الطاقة والتحمل، لحد ما فتحت درج محمد صدفه النهاردة ولقيت
فيه الورقة دي " شكرا لأستاذ محمد الذي تعلمنا منه الكثير " من طالبة إعدادي حضرت آخر تدريب في
آخر يوم شغل لمحمد، وآخر يوم برة السجن. تأملت الرسالة البريئة إلى ظهرت النهاردة تحديدا وشفنت
فيها تعبي بيتراجع ورحمة ربنا بتطمنه أنه مع العسر يسراً حقيقة ووعد من إلى قدر علينا المحنة وخبأ في
أصعب لحظاتها ألطاف بقدرها. ربنا يجعل كل الزنازين برداً وسلاماً ويصب عليهم رحمته صباً صباً. (من
المفارقات اللطيفة ان جهاد في فصل ٢/٢ ومحمد في زنازة ٢/٢)

<http://tiny.cc/z6ujrz>

عن شادي أبو زيد

شبر وقبضة: هي المساحة المتاحة للنوم داخل السجن
"لا اعلم لماذا تشاركني الصراخ تلك المساحة في نومي"



من أعمال شادي..

سنتين وشهرين على حبس #شادي_ابو_زيد

<http://tiny.cc/q1vjrz>

السجن يمنع إدخال علاج لزياد العلمي

قالت الكاتبة الصحفية إكرام يوسف، والدة المحامي والسياسي المعتقل زياد العلمي، إن إدارة السجن، رفضت اليوم الاثنين، إدخال دواء لزياد في محبسه.

وأضافت إكرام، أن الدواء المشار إليه "بيتولفكس"، وهو عبارة عن فيتامين بي "مهم جدا تناوله لمرضي السكر طوال حياتهم لتقليل التهابات الأعصاب، وبالفعل بقالنا سنة كاملة بنودي له علبة كل أسبوعين. فجأة كده قرروا منع دخوله، ورفضوا كمان إدخال بنطلون قطن لزياد، هو اللي طلبه برجلين واسعة من تحت عشان يقدر يشمره أثناء جلسات العلاج الطبيعي اللي طالبها. زياد عنده ركبة لس بها غضروف ومنذ سنة ما بيتحركش وده بسبب الام شديدة لأنه في ززانة ما فيهاش مكان يقفوا فيه حتى، أو يفردوا رجلهم. اللي شايف أن اللي بيحصل ده شيء مبرر، ربنا مستحيل يسامحه، داين تدان.

<https://bit.ly/2Aiv0Ym>

عن علاء وسناء سيف

كان لازم نقدم سناء قربان لسجونهم عشان يجيلنا جواب يطمنا على علاء؟
الجواب جدد الغضب

علاء كتب فيه ان لسة مش كل جواباتنا وصلت له، كمان ان دي المحاولة الثالثة فهيحاول يختصر يمكن المرة دي توصل.

يعني مرتين قبل كدة يبقي هيخرجوا جواب وما يحصلش؟!!!

كنا كتبنا لعلاء نسأله عن صحته والكورونا ونكتبه ارشادات ازاي هو واي حد بيتعامل معاه يحموا نفسهم من العدوي. ماعتقدش ده وصله أصلا، وما فيش اي رد أو معلومة منه.

ليه كل ده؟ ليه كل العتمة دي اللي انتو مصرين تبلعوا كل المساجين فيها وفي وقت زي دلوقتي؟ وليه العنف والغل والوسائل المنحطة دي تجاه أسرة عايزين يطمنوا على فرد منهم؟



لحد امتي سجونهم هتبقى جزء محوري في حياتنا؟ لحد امتي هتفضل سناء تدفع تمن انها ما بتنساش أخوها؟ ولحد امتي هيفضل علاء يدفع تمن انه ما اتكسرش رغم كل اللي عملتوه وبتعملوه؟
عامة السكة دي مالهاش غير طريقين، يا هينتهي بينا الحال معاهم في السجن، يا هينتهي بيهم الحال في وسطنا وهتحلوا عن حياتنا.

لكن تصور ان فيه سيناريو فيه انكم واخدين اي نفر مننا والباقيين قاعدين في البيت ساكتين حاطين ايدهم على خدهم ده مالوش اي احتمال في الواقع
يجعل مساكم ونهاركم شبه نواياكم وافعالكم
الحرية لأخواتي .. الحرية لسناء، الحرية لعلاء، الحياة لأسرتنا!

<http://tiny.cc/kxglrz>

عن المعتقل معتز أحمد

زي النهارده من سنه بالظبط ٢٠١٩/٦/٣٠ رحنا قدام قسم أول شبرا الخيمة في الميعاد اللي قال لي عليه العسكري الغلبان عشان اشوف معتز وهو نازل من عربية الترحيلات لكن لقيت عسكري غلبان ثاني قال لي ترحيلة بنها وصلت من ساعة وخذ من ٥٠ جنيه عشان يخليني ادخل أسأل عليه ضابط النوبتشي واللي أكد لي إنه موجود في الحجز تحت حاولت أقوله طب خليني اشوفه حتى من بعيد شخط فيا وقال لي مفيش حد هنا يلا ياست امشي من هنا. خرجت وانا بمنع دموعي من النزول ومش شايفة قدامي من الحزن والقهرة اني معرفتش اشوفه ولا اتطمئن عليه ولحد



الوقتي ماشفتوش

<http://tiny.cc/tsmorz>

والدة سولافه مجدي

أربع شهور ما نعرفش عنها حاجة، من آخر زرتها يوم 8 مارس.. 115 يوم بالتمام والكمال لا حس ولا خبر، ما خرجش فيهم منها ولا جواب، ولا حد يعرف عنها أي حاجة، لا المحامين يعرفوا، ولا أهالي البنات اللي معاها اللي بيخرج لهم جوابات كل مرة يعرفوا. ولا حد خالص حتى بتوع السجن ما بيردوش يقولوا كويسة. طالبت مسئولين بالسجن بمجرد طمأنتي عليها، أو حتى القول إنها بصحة جيدة ولو كذبا، إلا



أن ردهم دائما إنه لا جديد في الأمر.

كل مرة أسأل مسئول تفتيش الزيارات عن أخبارها يقول لي المرة اللي جاية، ومش راضيين حتى يطلعوا لي ورقة يطمنونني بيها عليها، وكل مرة أجري وراه علشان أسمع منه رد مختلف، يقول لي مفيش عندنا حاجة نقولها.

الوضع اللي بنعيشه مفيش بشر يتحملة، أنا مش طالبة أكثر من أنهم يطمنونني على بنتي، أو يبلغوني رسالة منها تقول لي يا ماما أنا كويسة، ليه مستكترين علينا حاجة زي كده، وإيه الضرر اللي هيعود عليهم في أني أتطمن عليها وأطمن أختها وابنها الصغير، اللي كل شوية بيسألني هي ماما هترجع من السفر إمتي وبطلت تبعت لي رسايل ليه.”

إحنا عايشين كل يوم في 24 ساعة في قهر وظلم، وإحنا شايفين ولادنا كأنه عدد اترموا جوة السجون من غير ما حد يسأل فيهم، كل الناس قلوب أهاليها محروقة زي ما أنا محروقة، إحنا بقينا عايشين بالاسم بس، أنا بتحرك على رجليا بالعافية علشان خاطر ابنها، وبخاف أبص في عينيه وهو بيسألني عنها وأنا مش لاقية رد.

<https://bit.ly/3ikg7WI>